

## МЕСЯЦА АПРЕЛЯ В 20-й ДЕНЬ

СВЯТАГО МУЧЕНИКА ГАВРИИЛА МЛАДЕНЦА, БЕЛОСТОКСКАГО

### ВЕЧЕР

Блажен муж: 1-й антифон. На Господи, воззвах: поставим стихов 8:

Празднику 3, и святому 5, глас 1:

Аще не обратитесь и не яко младенцы незлобивии пребудете, \* не можете в Царствие Небесное внити,— \* сице научает други Своя Христос, \* имже чашу страстей Своих обещавает пити; \* сию убо спасительную чашу и Гавриил младенец приемлет, \* младенческим незлобием мученический венец преукрашая \* и того ради сугубое стяжав дерзновение, \* во еже молитися о спасении душ наших. [Дважды.]

Глас 2:

Стекается соборище иудейское, \* от Бреста же и Белостока, \* да непорочнаго младенца мукам предаст. \* О, беззаконных, о, неверных! \* сего непротивлением не вразумившихся, \* и младенческую кровь до конца истощивших, \* и родители того обезчадствовавших, \* но мы, святаго мученика благоговейно почитающе, \* того днесь призовем в молитву, \* о еже такового жестосердия нам избавитися \* и спастися душам нашим.

Не плачите, родители убиеннаго от иудей отрочате, \* егоже хладное тело, \* от плотоядных птиц чудесне охраняемое, обретосте; \* не плачите и не рыдайте, \* сие истерзано от мучителей зряще, \* зане дух Гавриилов уже со Ангелы радуется, \* поруганное же тело его тлению неприступно явится \* и яко источник исцелений всем верным во веки пребудет, \* во уверение истинныя веры \* и во спасение душ наших.

Оле безумия иудейскаго! \* ибо и пси разумнее вас явишася, \* никакоже телесе святаго коснуться дерзнувшие, \* но сие от вран охранивше тщательное, \* неверствие ваше обличающе \* и христианскую веру утверждающе, \* вестъ бо Господь и безсловесными тварями Своя угодники прославляти. \* О, блаженный жребий святых Твоих, Господи, \* ихже молитвами просвети и спаси души наша.

Слава, глас 8:

О, ужаснаго твоего подвига, \* младенче святыи Гаврииле! \* О, тяжких мук твоих, надолзе претерпенных! \* Воистинну укрепляющей благодати Божией \* достоин явился еси \* и древним седми Маккавеом \* твердостию души уподобился еси, \* от недостойных единоплеменник тех умерщвляемъ, \* но всеми страшными терзаньми Христа не отлучивыйся \* и духом чистым к Нему преселивыйся, \* нас же молитвою твоею в вере утверждай \* и твоей ревности подражати научай.

И ныне, праздника.

Вход. Прокимен дне и чтения 3 мученическая.

Пророчества Исаиина чтение (глава 43):

Тако глаголет Господь: вси языцы собрашася вкупе, и соберутся князи от них. Кто возвестит сия в них? Или яже от начала, кто слышана сотворит вам? Да приведут свидетели своя, и оправдятся, и да услышат, и да рекут истину. Будите Ми свидетели, и Аз свидетель, глаголет Господь Бог, и отрок, егоже избрах, да познаете, и веруете Ми, и разумеете, яко Аз есмь, прежде Мене не бысть ин бог и по Мне не будет. Аз есмь Бог, и несть, разве Мене, спасаый. Аз возвестих и спасох, уничижих и не бе в вас чуждий. Вы Мне свидетели, и Аз Господь Бог, и еще от начала Аз есмь, и несть,

от рук Моих избавляяй. Сотворю, и кто отвратит то? Сице глаголет Господь Бог, избавляяй вас Святой Израилев.

### Премудрости Соломони чтение (глава 3):

**П**раведных души в руке Божией, и не прикоснется их мука. Непщевани быша во очесех безумных умерети, и вменися озлобление исход их. И еже от нас шествие – сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и яко всеплодие жертвенное, прият я. И во время посещения их возсияют и, яко искры, по стеблию потекут. Судят языком и обладают людьми, и воцарится Господь в них во веки. Надеющиеся Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

### Премудрости Соломони чтение (глава 4):

**П**раведник аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богови быв, возлюблен бысть и живой посреде грешник, преставлен бысть. Восхищен бысть, да не злоба изменит разума его, или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеву душа его, сего ради потщася от среды лукавствия. Людие же, видевше и не разумеvше, ниже положше в помышлении таковое, яко благодать и милость в преподобных Его и посещение во избранных Его.

### На литии стихиры праздника или храма.

#### Слава, святому, глас 4:

**М**ладенец и мученик и веры истинныя утверждение, \* святе Гаврииле, явился еси \* и безумие иудейское нетлением твоего телесе обличил еси, \* темже и нас противу неверия и ереси молитвами твоими укрепи \* и Царствия Небеснаго учение вложи в сердца наша, \* да тя прославим, заступника нашего, \* подающаго душам нашим мир \* и всем, призывающим тя, велию милость.

#### И ныне, праздника.

#### На стиховне стихиры, глас 3:

**К**то не умилится сердцем, \* муки твоя поминаяй, блаженне, \* яже чрез девять дний от нечестивых претерпевати изволил еси? \* Первее бо, кровь твою помалу изливше, \* еле жива суца ты оставиша иудеи, \* да множайшим мукам предадут твое непорочное тело, \* еже и смерти предавше конечным крове истощанием, \* на ниву в день Святой Пасхи тое безстудне извергоша; \* мы же, твоя безчисленные раны целующе, \* подвиги твоя тепле прославляем.

**Стих:** Праведник, яко финикс, процветет, \* яко кедр, иже в Ливане, умножится.

**С**обравшимся на конечное убиение Гавриила младенца иудеом, \* того уже измученное тело на стене распято бысть, \* и ребра ему оружием многажды прободоша, \* ниже стенаниями его умилшася нечестивии, \* ниже об отмщении Господни помыслити хотяху, \* но сего, яко мученика, прослави Христос Бог наш \* и яко подобника Своя спасительныя страсти \* христианом чтити повелевает.

**Стих:** Насаждени в дому Господни, \* во дворех Бога нашего процветут.

**З**ри, о душе моя окаянная, \* каковое мужество во младенчестем телеси являет Гавриил мученик, \* како той от Христа не отречется, \* аще и паче седмицы мучениям предавашся; \* не обленися убо, душе моя, \* противу страстей подвизатися, \* устыдится младенца блаженнаго, \* множество мучителей победившаго, \* и тому со усердием помолися, \* да на невидимыя враги победитель явишися.

**Слава, глас 7:**

**У**жас бе видети родителем младенческое тело, люте истерзано, \* на ниве посреде псов, аки стражей верных, лежащее, \* из негоже всю кровь мучители извлекоша \* и кожу его повсюду прободоша, \* обаче Божественная слава, чрез зверей явленная, \* отцу и матери слезы на упование преложи, \* и веру Христову в российстех людех утверди, \* и нас к пению славы твоя, мучениче, воздвизает.

**И ныне, праздника.**

**На благословении хлебов тропарь, глас 5:**

**С**вятый младенче Гаврииле, \* ты за Прободеннаго нас ради от иудей \* люте от онехже в ребра прободен был еси \* и за Истощившаго кровь Свою за нас \* все тело твое на истощение крове \* в лютыя язвы предал еси, \* ныне же во славе вечней с Ним вселился еси. \* Тем помяни и нас, молим, zde чтущих память твою, \* прося нам здравие телеси \* и спасение душам нашим.

## На Утрени

На Бог Господь: тропарь праздника, дважды.

Слава, святого, глас 5:

Святый младенче Гаврииле, \* ты за Прободеннаго нас ради от иудей \* люте от онехже в ребра прободен был еси \* и за Истощившаго кровь Свою за нас \* все тело твое на истощение крове \* в лютыя язвы предал еси, \* ныне же во славе вечней с Ним вселился еси. \* Тем помяни и нас, молим, zde чтущих память твою, \* прося нам здравие телеси \* и спасение душам нашим.

И ныне, праздника.

По 1-м стихословии седален праздника или сей, глас 1:

Возсия нам память мучений твоих, Гаврииле, \* о младенцах к Богу ходатаю теплейший, \* мужем же и женам терпения учителю; \* приидите, того подражаем подвиги и на бесовския прилоги мужественно ополчимся, \* младенца мученика в помощь призывающе.

Слава, и ныне, праздника.

По 2-м стихословии седален праздника или сей, глас 2:

Написовашеся в летописи Заблудовстей, \* яко убиенный от иудей Гавриил младенец \* тойже в книзе животней написовашеся, яко мученик и чудотворец, \* егоже молитвами и нас да не изгладит из книги живота \* Христос и Спас душ наших.

Слава, и ныне, праздника.

Псалом избранный мучеником и величание:

Величаем тя, \* страстотерпче святый, младенче Гаврииле, \* и чтим честная страдания твоя, \* яже за Христа \* претерпел еси.

По полиелеи седален, глас 3:

Излиянною твоею кровию, Гаврииле, мучениче Христов, \* иудейское нечестие посрамляется, \* и еретическая блуждания обличаются, \* и недужи различнии исцеляются, \* и души наша верою спасаются.

Слава, и ныне, праздника.

Степенна, 1-й антифон, 4-го гласа.

Прокимен, глас 4: Праведник, яко финикс, процветет, \* яко кедр, иже в Ливане, умножится.

Стих: Насаждени в дому Господни, во дворех Бога нашего процветут.

Всякое дыхание:

Евангелие от Луки, зачало 63.

Рече Господь: ничтоже покровено есть, еже не открытается, и тайно, еже не уразумеется. Зане, елика во тме ресте, во свете услышатся, и еже ко уху глаголасте во храмах, проповестся на кровех. Глаголю же вам другом Своим: не убойтесе от убивающих тело и потом не могущих лишше что сотворити. Сказую же вам, кого убойтесе, убойтесе имущаго власть по убиении воврещи в дебрь огненную, ей, глаголю вам, того убойтесе. Не пять ли птиц ценится пенязема двема? И ни едина от них несть забвена пред Богом. Но и власи главы вашей вси изочтени суть. Не

убойтеся убо, мнозех птиц унши есте вы. Глаголю же вам: всяк, иже аще исповесть Мя пред человеки, и Сын Человеческий исповесть его пред Ангелы Божиими, а отвергийся Мене пред человеки отвержен будет пред Ангелы Божиими. И всяк иже речет слово на Сына Человеческаго, оставится ему, а на Святаго Духа хулившему не оставится. Егда же приведут вы на соборища и власти и владычества, не пецытеся, како или что отвещаете, или что речете, Святыи бо Дух научит вы в той час, яже подобает рещи.

### По 50-м псалме стихира, глас 2:

Днесь льстивными словесы младенец из дома отча изводится, \* днесь неповинная того кровь проливается, \* и в подземная святыи Гавриил от иудей заключается, \* и мучителей сонмище собирается, \* днесь совет злобы исполняется \* и лютой смерти отроча предается, \* дух же его Небесным чином сочетавается, \* и мы тому вопием, умильно глаголюще: \* спасай нас предстательством твоим, \* угодниче Божий и мучениче Христов, Гаврииле блаженне.

Канон праздника на 6 и святаго на 8, егоже краегранесие: Младенца молитвами спаси мя. Глас 4.

### Песнь 1

**Ирмос:** Лицы израильстии \* невлажными стопами \* понт Чермный и влажную глубину прогнавше, \* всадники тристаты, враги, видяще в ней погружены, \* с веселием пояху: \* поим Богу нашему, яко прославися.

Младенче и мучениче, чудотворче и болезней целителю, Гаврииле, угодниче Христов, достойными словесы твоя подвиги восхвалити недоумею, обаче твоего терпения и незлобия красотою умиляюся, сих дарований причастника и мене покажи, твоего молитвенника.

Людие россиястии от иудей умученнаго младенца видевше, от псов же несмысленных, яко сокровище, охраняема, взываху: Господи, того молитвами помилуй нас.

Анна смиренномудренная, Гавриила мученика мати, со отцем его Петром трудолюбивым слезы на радость преложиша, своего отрочате уведевше неувядаемую славу.

**Богородичен:** Жезл Ааронов прозябший, иже от Иессея проображаше израстший корень, Тя, Пречистую, цвет миру возсиявшую, Бога воплощенна, Егоже о нас молящи не престай, Приснодево, прибегающих к Тебе.

### Песнь 3

**Ирмос:** Яко неплоды роди от язык Церковь, \* и многое в чадах изнеможе сонмище, \* чудному Богу нашему возопиим: \* Свят еси, Господи.

Добро было бысть вам не родитися, нечестивии мучителие, зане отраднее будет Содому и Гоморру в День Судный, неже Христова исповедника убийцам. Того молитвами, Господи, утверди православных веру.

Егда подписание, еже о твоём мучении, от иудеев бывшем, мучениче, сотвориша судии заблудовстии, тогда истерзанное тело твое земле благочестно предаша людие. Но прошедшим тридесатым летом тоезде тлению непричастно обретоша и Господне о тебе промышление прославиша.

**Нищим и обидимым близ есть Господь:** Той бо, от нищих родителей отъяти чадо попустив нечестивым, паче царей земных безчадныя прославляет, зане и царие и святителие тех отрочати молитвенно преклоняют колена.

**Богородичен:** Яко носиши на руку, Марие, и от сосцу питаеши Питающаго всякое дыхание, Егоже, Богородице, чтуще, проповедаем: молися Ему, Чистая, о всех нас.

**Кондак, и икос праздника.**

**Седален святого, глас 8:**

**О,** каковая мучения твоя, отроча, Богу возлюбленное! \* О, каковая терпения твоего крепость, \* избодение бо, и медленное крове испущание, \* и плоти твоея раздиране за Христа приял еси, \* но Того ради заступник о страждущих младенцех у Христа Бога являеши, \* матери твоея, обезчадствованней бывшей, \* всем матерем, о чадах молящимся, утешитель бываеши \* и молишия присно о спасении душ наших.

**Слава, и ныне, праздника.**

**Песнь 4**

**Ирмос:** Услышах Твое, Христе, воистинну преславное, \* яко безсмертен сын Бог \* уподобися смертным человеком \* и пребысть, еже бе, \* и того ради Твою славою силу.

**Царем и мучителем** преклониша выи своя на убиение древнии мученицы, тех подобник бысть Гавриил младенец, кровь свою неповинную на истерзание отдав иудеом жестокосердым. Господи, того молитвами вложи ревность о славе Твоей в души наша.

**Аще** и в темней погребнице заключиша тебе иудее, о мучениче, аще и страшными муками тебе умертвиша, но абие во светлый чертог Господень дух твой, радуяся, вселися, идеже со Ангелы о славе Господней днешь ликует.

**Милостив** буди к моим немощем, мучениче святыи Гаврииле, моего малодушия не возгнушався, прощение ми от Господа испроси, иже себе за веру Его не пощадивый и в младенчестем телеси Того прославивый.

**Богородичен:** Тебе, Приснодеву и воистинну едину Богородицу, славим, Юже прообразоваше Боговидцу Моисею неопально, Пречистая, купина, огню примесившаяся.

**Песнь 5**

**Ирмос:** Просвещение Твое, Господи, низпосли нам \* и от мглы прегрешений разреши ны, Блаже, \* Твой мир даруй.

**Образ** злострадания Гавриилова приемем, братие, и своего о вере нерадения устыдимся, от убивающих тело не убоимся, но Имущему власть по убиении в геенну огненную ввергнути, Тому со страхом повинимся, страстотерпца святого в помощь призывающе.

**Люта** есть мука, но сладок рай, болезненно на земли безчадие, но неисчерпаемо утешение наше,— родителя Гавриилова взываху,— от земных бо печалей чадо наше к вечной радости преселися.

**И**же о болезнях и муках чад своих скорбяще, родители, с верою ко гробу Гавриилу припадите, есть бо заступник о них пред Христом, яко кровь свою за исповедание истинныя веры излиывый.

**Богородичен:** Мучителей разум девственное посрами чрево: Младенец бо язву аспидную душегубную испыта рукою и, отступника гордаго низложив, верным под нозе покори.

### Песнь 6

**Ирмос:** Возопи, прообразуя погребение тридневное, \* пророк Иона, в ките моляся: \* от тли избави мя, Иисусе, Царю сил.

**Т**воих раб моления не отвержи, младенче премудре, твоею славою умиляющихся и твоя подвиги со умиленным сердцем воспевающих, аще терпения твоего не стяжавших, но исправити житие свое желающих.

**В**сяческих сокровищ, имиже земля украшается: злата, и бисера, и камней многоценных, честнейша суть святых угодников нетленные мощи, ими бо благодатная сила Божия действует, сию убо нам испроси, угодниче Христов, во исцеление душ и телес наших.

**А**ще и многая гонения православнии христиане от иудей и от еретик прияша, окрест славныя обители твоя живущии, обаче стояние твое о истинней вере вспоминающе, от прославления истиннаго Бога и твоего предстательства никакоже отпадоша.

**Богородичен:** Древле убо прельсти мя змий и умори мя праматерию мою Евою, ныне же, Чистая, Тобою Создавый мя из истления воззвал еси.

### Кондак, глас 6:

**О**течество твое Зверки бысть, \* мучениче Христов Гаврииле, \* идеже от истых зверей – иудеев восхищен: \* абие родителей лишен еси, \* таже вся порядку люте претерпев, \* в отечество Небесное преселился еси. \* Восхищай и нас zde от всяких напастей и скорбей \* и умоли, молим тя, \* улучити вечное наследие твое.

**Икос:** Прославим, братие, Гавриила младенца, о Христе злострадания приявшего, той бо, яко ягня незлобивое, льстивому иудею последовав, из дома отча восхищен бысть и в темную погребницу ввержен, ужасная же терзания и избодение плоти своя претерпев надолзе, яко жертва чистая Троице принесеса и многая заступления о молящихся ему чрез многая лета показывает, вся приходящая в церковь его зраком нетленнаго телесе своего умиляя. Тому убо возопиим: умоли, молим тя, улучити и нам вечное наследие твое.

### Песнь 7

**Ирмос:** Авраамстии иногда в Вавилоне отроцы \* пещный пламень попраша, \* песнями взывающе: \* отец наших Боже, благословен еси.

**М**атерей скорбящих утешителю, младенцев болящих целителю, Гаврииле, угодниче Христов, душу мою, скорбящую о гресех своих, утеши и исцели и сию над плотию госпожу молитвою твоею соделай, своя плоти Христа ради не пощадивый.

**И**ли не разумеете, нечестивии иудеи, яко Бога отец ваших врага себе соделоваете, Того создание неповинное люте терзающе и сицевым деянием приносить ему службу мняще, безумнии. Господи, Гавриила молитвами чад их сердца умягчи и сердца наша от сицевого лютоги избави.

**С**луцк град воистинну блажен есть, тамо бо прошедшим пятидесятым шестим летом положися мученика Гавриила нетленное тело, тамо до днесь слезы, молитвы и благодарения пред гробом его от матерей о чадах своих изливаются и всех верующих приемлются моления.

**Богородичен:** Превышши тварей всех еси, яко Творца рождши и Господа. Темже Ти вопию, Богородице: Благословенная, Господь сил с Тобою.

### Песнь 8

**Ирмос:** Радующеся по осуждении мучительством отроцы, \* яко да не богом скверным послужат всем, \* но Живому Богу, \* на огонь дерзнуша, \* от Ангела же орошаеми, песнь пояху: \* дела Господня, Господа пойте \* и превозносите во вся веки.

**П**тицы сыродцы, над истерзанным телом мученика реюще, и пси гладнии, сия отражающе и тело мученика храняще, обличителие злодеяния иудейскаго явишася, славы же святого немии проповедницы.

**А**ще и зверие глада своего о святом телесе утолити не дерзнуша, како убо злоба иудеев тем насыщашеся? Како тии, чудо зряще, не покаяшася? Зри, о душе моя, сих ожесточение, и ужаснися, и святому сему помолися, да от всякия злобы тебе выну ограждает.

**С**лезы умиления о подвизе и о славе младенца и мученика проливающе, братие, своего окаянства восплачим и своего нерадения устыдимся: аще бо тако Богу угоди младенец малый, почто мы, мужие, суще о сем небрегохом?

**Богородичен:** От ребра Адамова создавый Тя, от Твоего девства воплотися, Иже всех Господь, Егоже поюще, вопием: вся дела, благословите, пойте Господа и превозносите во вся веки.

### Песнь 9

**Ирмос:** От земнородных рождшися и Творца рождающая, \* наша похвало, Богородице Чистая, \* Тя, яко владычествующую тварьми, величаем.

**И** ныне, угодниче Божий Гаврииле, о народе российском буди пред Господом предстатель, якоже древле: тогда бо от иудей и еретик мучения христиане приимаху, ныне же от обою соблазном вдаются люте, темже твоего стояния даруй нам память и о подражании тебе ревность благую.

**М**ысленнаго убийцу души моя, сию поглотити ищуща, побеждати помози ми, Божий угодниче, тело свое на истерзание предавый, но душу свою непорочну от тех устрашения сохранивый и Христу, аки дар честен, страдания своя принесый и сего ради от Него благодать приявый, во еже молитвы наша Престолу славы Его присно возносити.

**Я**звы, на твое младенческое тело от иудей возложенныя, язвы врагу спасения нашего явишася, демонов победителю, Гаврииле блаженне, от ихже мучительства избави души наша и над тех искушений победители предстательством твоим яви нас.

**Богородичен:** От земнородных возрастши и Зиждителя рождши, радуйся, наша похвало, Богородице Чистая, Тя, яко обладающую тварьми, величаем.

Светилен.

Подобен: Плотию уснув:

Плоть на растерзание иудеом вдавшего, \* дух же свой Богу предавшего, \* днесь воспоим во младенцах мученика, \* того приводяще в молитву о умирении Церкви и о спасении душ наших.

Слава, и ныне, праздника.

На хвалитех стихиры праздника 3 и святого 3, глас 5:

Радуйся, младенцев похвало преславная; \* радуйся, мучеников сопричастнице \* и российского народа славо пречестная, \* от темных погребницы просиявшая \* и православных сердца просветившая. \* Радуйся, молитв матерей скорбящих скорый слышателью; \* радуйся, дводушных человек молчаливый обличителю. \* Помози убо нам, праведниче Божий, \* за святую веру крепко подвизатися \* и молитву сотвори о спасении душ наших.

Радуйся, чудес источниче, \* сам же чудо долго терпения явивыйся; \* радуйся, младенческую чистоту с мужеством мученика сочетавай \* и иудейское злочестие посрамивый. \* Радуйся, Российской стране сокровище неоцененное \* в твоих святых мощех даровавый \* и моление теплое ко Христу возносяй \* о умирении мира, и Церквей стоянии, \* и о спасении душ наших.

Радуйся, сердца всех человеков умиляй; \* радуйся, твоим мучительскому насильству противлением \* и хладных души покаянием сокрушаяй. \* Радуйся, смиренных сердцем и нищих утешение, \* и младенцев непостыдное упование, \* и иноков Евангельскому младенчеству учителю, \* и молитвенниче о душах наших.

Слава, глас 2:

Страстей Христовых седмицу совершающим христианом \* и души своя ко сретению Святыя Пасхи приуготовляющим, \* Гавриил младенец от иудей страсть приимаше \* и, на стене погребницы темный распинаемый \* за распятого Спаса, \* кровь свою изливаше, \* пришедшу же дню Господня Воскресения \* дух его ко Христу в Небесная селения отъиде, \* плоть же его иудеи вне града извергоша, \* но сия, нетленна пребывающи, \* далее до днесь общее воскресение проповедует \* и угодника умоляти нас научает, \* да молится непрестанно о душах наших.

И ныне, праздника.

Славословие великое. И отпуст.

## НА ЛИТУРГИИ

Блаженны от канона праздника песнь рядовая и святого песнь 3-я.

Добро было бысть вам не родитися, нечестивии мучителие, зане отраднее будет Содому и Гоморру в День Судный, неже Христова исповедника убийцам. Того молитвами, Господи, утверди православных веру.

Егда подписание, еже о твоём мучении, от иудеев бывшем, мучениче, сотвориша судии заблудовстии, тогда истерзанное тело твое земле благочестно предаша людие. Но прошедшим тридесетим летом тожде тлению непричастно обретоша и Господне о тебе промышление прославиша.

**Слава:** Нищим и обидимым близ есть Господь: Той бо, от нищих родителей отъяти чадо попустив нечестивым, паче царей земных безчадныя прославляет, зане и царие и святителие тех отрочати молитвенно преклоняют колена.

**И ныне: Богородичен:** Яко носиши на руку, Марие, и от сосцу питаеши Питающего всякое дыхание, Егоже, Богородице, чтуще, проповедаем: молися Ему, Чистая, о всех нас.

**Тропарь святого, глас 5:**

Святый младенче Гаврииле, \* ты за Прободеннаго нас ради от иудей \* люте от онеже в ребра прободен был еси \* и за Истоцившаго кровь Свою за нас \* все тело твое на истощение крове \* в лютыя язвы предал еси, \* ныне же во славе вечней с Ним вселился еси. \* Тем помяни и нас, молим, зде чтущих память твою, \* прося нам здравие телеси \* и спасение душам нашим.

**Кондак святого, глас 6:**

Отечество твое Зверки бысть, \* мучениче Христов Гаврииле, \* идеже от истых зверей – иудеев восхищен: \* абие родителей лишен еси, \* таже вся порядку люте претерпев, \* в отечество Небесное преселился еси. \* Восхищай и нас зде от всяких напастей и скорбей \* и умоли, молим тя, \* улучити вечное наследие твое.

**Прокимен, глас 4:** Из уст младенец и ссущих \* совершил еси хвалу.

**Стих:** Небеса поведают славу Божию, творение же руку Его возвещает твердь.

**Апостол, зачало 58 от полу.**

**Братие:** отложив всякую злобу и всякое коварство, и лицемерие, и зависть, и всякое злословие, как новорожденные младенцы, возлюбите чистое словесное молоко, дабы от него возрасти вам во спасение; ибо вы вкусили, что благ Господь. Приступая к Нему, камню живому, человеками отверженному, но Богом избранному, драгоценному, и сами, как живые камни, устрояйте из себя дом духовный, священство святое, чтобы приносить духовные жертвы, благоприятные Богу Иисусом Христом. Ибо сказано в Писании: вот, Я полагаю в Сионе камень краеугольный, избранный, драгоценный; и верующий в Него не постыдится. Итак Он для вас, верующих, драгоценность, а для неверующих камень, который отвергли строители, но который сделался главою угла, камень преткновения и камень соблазна, о который они претываются, не покоряясь слову, на что они и оставлены. Но вы, род избранный, царственное священство, народ святой, люди, взятые в удел, дабы возвещать совершенства Призвавшего вас из тьмы в чудный Свой свет; некогда не народ, а ныне народ Божий; некогда непомилованные, а ныне помилованы.

Аллилуия, глас 1: Бог с небесе приниче на сыны человеческия.

### Евангелие от Матфея, зачало 74.

**В**о время оно, приступиша ученицы ко Иисусу, глаголюще: кто убо болий есть в Царствии Небеснем? И призвав Иисус отроча, постави е посреде их и рече: аминь глаголю вам, аще не обратитесь и будете яко дети, не внидете в Царство Небесное. Иже убо смирится яко отроча сие, той есть болий во Царствии Небеснем. И иже аще примет отроча таково во имя Мое, Мене приемлет, а иже аще соблазнит единого малых сих верующих в Мя, уне есть ему, да обесится жернов оселский на выи его, и потонет в пучине морстей. Горе миру от соблазн, нужда бо есть приити соблазном, обаче горе человеку тому, имже соблазн приходит. Аще ли рука твоя или нога твоя соблажняет тя, отсецы ю и верзи от себе, добрейше ти есть внити в живот хрому или бедну, неже две рuce и две нозе имущу ввержену быти во огнь вечный. И аще око твое соблажняет тя, изми е и верзи от себе, добрейше ти есть со едином оком в живот внити, неже две оце имущу ввержену быти в геенну огненную. Блюдите, да не презрите единого от малых сих, глаголю бо вам, яко Ангели их на небесех выну видят лице Отца Моего Небеснаго. Прииде бо Сын Человеческий взыскати и спасти погибшаго.

**Причастен:** Из уст младенец и ссуших совершил еси хвалу.

### Молитва

**М**ладенческаго незлобия хранителю и мученическаго мужества носителю, Гаврииле блаженне, страны наша адаманте драгоценный и иудейскаго нечестия обличителю! К тебе мы, грешнии, молитвенно прибегаем и, о гресех своих сокрушающесея, малодушия же своего стыдящесея, любовию зовем ти: наших скверн не возгнушайся, чистоты сый сокровище, нашего малодушия не омерзи, долготерпения учителю, но паче сих, немощи наша от Небес видя, тех исцеления нам твоею подаждь молитвою и твоея Христу верности подражатели нас быти научи. Аще ли терпеливно крест искушений и злостраданий понести не возможем, обаче и тогда милостивыя твоя помощи не лиши нас, угодниче Божий, но свободу и ослабу нам у Господа испроси. Таже и молящися о чадах своих матери услыши, здравию и спасению младенцем от Господа податися умоляй. Несть таковаго жестокаго сердца, еже слышанием о муках твоих, святыи младенче, не умилится, и аще кроме сего умиленного въздыхания никоегоже благаго деяния принести возможем, но и таковым умиленным помыслом наши умы и сердце, блаженне, просветив, на исправление жития нашего благодатию Божиею нас настави. Вложи в нас о спасении души и о славе Божией ревность неустанную и о часе смертнем память неусыпную хранити помози нам. Наипаче же в смертнем успении нашем терзания демонская и помыслы отчаяния от душ наших предстательством твоим отжени и сия упованием Божественнаго прощения исполни, во еже и тогда и ныне славити нам милосердие Отца, и Сына, и Святаго Духа и твое крепкое заступление во веки веков. Аминь.

**СВЯТОЙ МУЧЕНИК-МЛАДЕНЕЦ ГАВРИИЛ БЕЛОСТОКСКИЙ (ЗАБЛУДОВСКИЙ)**

Святой мученик-младенец Гавриил Белостокский (Заблудовский) родился в 1684 году в деревне Зверьки Гродненского повета, в семье православных родителей Петра и Анастасии Гавдель. В 1690 году, в день, когда родителей не было дома, младенец был увезен в Белосток евреем-арендатором, где и претерпел мученическую кончину. Тело святого мученика-младенца было найдено и предано христианскому погребению. Через 30 лет после погребения мощи святого Гавриила оставались нетленными. В 1746 году храм в Заблудове, в котором был погребен младенец, сгорел (возможно, был сожжен), но святые мощи уцелели. Они были перенесены в Слуцкий Троицкий монастырь. Тогда же было установлено празднование святому мученику Гавриилу. Слуцкий архимандрит Михаил Козачинский составил стихотворную повесть о мученике Гаврииле.

\* \* \*

Аще случится память святого Гавриила младенца во святыи и великий вторник, или в великую среду, или в четверток, и поем службу его в неделю Ваий, якоже в Типице, во главе о храмах показася. Аще ли будет память его в великий пяток, или в субботу, или в самый святыи день Пасхи, и поем службу его в понедельник Пасхи; аще ли в той понедельник будет память святого Георгия Победоносца, и поем службу святого Гавриила во вторник Пасхи. Прочее же поем его службу по уставу дне святого Георгия Победоносца, иже есть в 23-й день месяца апреля. Сие же разумей, яко идеже указася канон, или стихира, или тропарь рекше праздника, несть убо се праздник самыя святыя Пасхи, но по Троице дне того, сие есть седмичнаго дне Антипасхи или Мироносиц, или расслабленнаго, или Преполовения, в оньже день обрящещи в Троице подобающия стихиры, и каноны, и седальны.

Аще ли будещи пети службу святого Гавриила, кроме Пятидесятницы или недели цветоносия, во ин день года, и тогда вместо канона праздника глаголи канон Богородицы от Октоиха настоящего гласа и Богородичны воскресны стихир, и седальнов, и тропарей и светильна в тойже глас, точию на Господи, воззвах: Богородичен первый настоящего гласа. Аще ли будет кое-либо поспразднство, то паки ин устав обрящещи како подобает тогда правити память святого, имущаго полиелей или бдение: есть бо сему образ января в 11-й день на память преподобнаго Феодосия Великаго и поспразднства Богоявления. Тоже и в главах Типикона о храмах обрящещи.